



Chamna Am

(A Monthly Organ of the Evangelical Synod Church)

Vol. XXXIV

No. 05

August, 2019



ESC COMMON PROJECT

2019
KUM
THUPI:

"THUOKHAT TAKIN TAI HITIU"
HEBRAI 12:1

Editor: Rev. T. Kamgin Gangte

Vol. XXXIV No. 05
August, 2019

Editorial Board

Chairman:
Upa Dr. L.S. Gangte, M.A. M.Phil.

Editor:
Rev. T. Kamgin Gangte, M.Th.

Asst. Editor-cum-Circulation Manager
Rev. Khaitinthang

Bible Study:
Pr. Khailalsiem M.Th.
Evan. Paukhomang B.D.

Contributing Editor:
Upa Paozalun BA
Rev.Khaigin BD
Rev. L.Sata B.Th.
Rev. Thangkhosiem M.Div.
Rev. T. Kampu M.Th.
Rev. Henkholien MBS
Miss Chinbawi MRE

Editor ana hite	
1. Upa Lalkhogin	1986
2. Rev. Khaigin Gangte	1987-2005
3. Rev. Lamkhawsat	2006-2013
4. Rev. Thangkhosiem	2014-2017



contents

- Editorial.....01
- Gah masa kut02
- Pathien a mi loppite Lohn Hyde04
- Zie tak a hih bang hih na hi?11
- Mi nungchawn14
- Kross thuoh thum17
- El-Bethel Revival huih nung kit le ut um e maw20
- SBS Diploma in Basic Theology Graduate21
- Israel te'n Isu a pawmloh nau23
- Pastor24
- Pathien lungsetna muh/chan baihlaenna pen26
- Sum lehmihing khawizaw alul zaw?27
- NSSU June Mission 2019.....29

- Kumkhat lakman Rs. 150/-
- Thusuoh nuom nei te'n ESC Office Post Box-54, Chiengkawnpang, Churachandpur a thak ding.
- Ala nuom leh a man pie nuom te'n circulation Manager, hetsak ding.
- Thukisuoh cheng hi ESC Ngaihdan ahi vek kel puoi. Article zikte'n a mawh a kipuok chiet ui.

CHAMNA AW PHUNGVUKNA DING

1. Chief Patron	-	₹ 5000.00
2. Patron Member	-	₹ 4000.00
3. Diamond Member	-	₹ 3000.00
4. Gold Member	-	₹ 2000.00
5. Silver Member	-	₹ 1000.00

PRINTED AT
THAWNSAAU PRINTING WORKS
CENTRAL LAMKA

Editorial

Tulai khawvel chiehzel dan hi a helo kitam talo mai thei ahi. Khawvel a gamkaih a et in a khangto deuh a um a, a khangtolo deuh a um hi. Thiemna chitna leh thil hihtheihna haw a ki el in, “Kei u gam in zie chu zie khah ka hih uh,” tih nawpna ziek in thil thak thak mi gam in ahihkhak nailoh tia abawl dawk ding ki el in atum tawk un a buoi thei mah mah zieng ui. Tu naihcha khan le India te'n, a gam uh khantoh dan leh a thil hihtheih uh taklat nuom in, Rocket chikhat Chandrayaan 2 kiti chu thapi a lut ding ti'n ana kapdawk ui, tih thu het ahi. Zie hi le India a dingga kisuonpih umtak khantohna khat chuh ahi. Zie Chandrayaan 2 hi Indian Space Research Organisation (ISRO) te siem ahi le akitii. A mission u hi atup bang u a, a lawhtit chun September tha bul lam leh Thapi lutzo dingga ginchak ahi. Zie hi tu naihcha a India te mission chuh ahi. Atup u hi Gamdang cheng sanga challatna chan tei ding tih ahi. Gam challang ahihguotnau khatle ahi.



Zie guol hin ei uh gingtu (Kristien) te'n le Mission nei i hih uh i ki het uh ginchak a um hi. Kristien te mission hi chu challat tupna ziek chu ahih ginchak a umpuoi. Ahi a lah na phasem chuh ut leh utloh thu hilo in challatna khat chu neitei dingin ginchak a um hi. Leng Darius in a gam vahawm ding mi 120 a teldawk a zie te chunga lawiupa ding chun mi 3 a teldawk kita 3 te lak achun Daniel le khat in atel a, zie mi 3 te laka challang pen kha Daniel ahi. Bang zieka Daniel kha challang chuom diek a? I tihleh, Dan. 6:3 na akhan, “Chun Daniel hin lungthim pha chung chuong aneih ziek in,” tih akimui. Khawvel lama challat dan leh Thagau gam a challat dan kibang khel puon a. Daniel in Pathien na ginum tako a sep ziek in a lawite lungthim a khan itthikna nasatak ahung um lawh a, a awkna ding thang kamsak guon Lengpa kawm ah report a pieu hi (6: 7). Lam chuom chuom ah a thiemlohma ding hawl mahleule a lungthim sielo (Lungthim pha chungchuong) nana na chuh a lamzang to zel hi. Atawp in a mission, “chanchinpha thehzakna,” chuh alawh ting thotho hi. (6; 25, 26). I Bible simna ahin Daniel challat thu muh in a um a, ahihziek in challat tupna zieka thil hih chuvang ahi puoi, tih a het theih hi. Daniel guola hi deihsakna changa lawhtingto zel di'n, Sapchuom tin leh mimal tin Lalpa'n hun umpih chiet ta hen.

GAH MASA KUT

- Rev Dr Ellien Gangte

Leileha sunga um chengcheng hi Lalpa a ahii; Khawvel leh a sunga um cheng chengte tawh. Sam 24:1. Gah masa Kut hi Pathien thilsiem apat hung kipan ahi. Pathien in thil cheng A siem a, Amah a vek ahihna suklatna a Gah masa kut kimang a, eipie Pa Pathien kawma kipahtu genna a kimang sek ahi. Pathien bangkim siemu leh neiteu ahihna zala Bible in gancha a kithawihna haw nei dingin eina hilh ahi. Thiempudante 1:5. Gam hih Pathien thilpiek ahi a, Lei Gah masa piek ding ahi. Pawtdawkna 23:16,19. Pawltak kut, Pawtdawkna 34:22; Thuphuon 2:14; 23:20. Olive thau, Kisimna 18:12; Dannihna 18:4. Uain, Danihna 18:4; Khuoizu, 2 Khangthubu 31:5. Belam mulmet masakpe'n, Dannihna 18:4; Lo a thaigah, Nehemia 10:35. Thunthun Lui in chientak in thilcheng Pathien apat ahi a, I zahnau suklatna a I piek ding uh ahi. Gamnuoia sa tin cheng hi kei a ahi ngâla, Tang sangkhat chunga gancha um haw chule. Sam 50:10.

Gingtute hih thilsiem tincheng lak apat gah masa pen ihiu hi. A thilsiem haw laka gah masa lawi I hung hih theihna dingun, Amah deihlam a Thutak a chuh ei hin uh I hiu hi. Jakob 1:18. Chuleh, ka cha deih tak, Epainetas, Asia gama Krista a gah masapen kha le nei hun chibai sak un. Rom 16:5. A gam a gam a hukdamna changte le Krista a dinga gahmasa hito zel ahi. Gingtu gah masa haw hih hukdamna a Pathien nasep lopina kilatna ahi. Amau haw chu pieng masa, Krista Thisan a tatte ahiu hi. Gingtute hi Pathien a dinga gahmasa leh sukthientho aum I hiu a, I thienthoh dinguh ahi. Israel chuh Lalpa a ding a kawihchuom, a gah pung masa ahi. Amah ne zo te chuh thiemloh chang untin; a chung u ah sietna hung tung ina," tih hi Lalpa kamsuok ahi. Jeremia 2:3. Pathien mite chu gahmasa, Krista kawm a thiengtho leh pawmtak hiding a, I kipiek ding uh ahi. "Khutichun, suohpihte, Pathien khuotuohna vang hin, kithawihna hing leh thiengtho leh, Pathien pawm tâk hiding in na sapum u chuh na piek

dingun ka hun nget na hiu hi; zie chuh na sep ding mawng uh ahi." Rom 12:1. Thagau apat gah masa I hih ziekun tuhun a Thagau hukdamna na sepna hi gahsuo ahi. Gingtute taksapum hukdamna chu Laktoh 'Rapture' phatleh I chan dinguh ahi. Amah chapa ngéi le sit lo a I bawn u a sika piepa chun thil chengcheng le a thawn in ei pie tello ding ahi a ahim? Rom 8:32. Himahlele, Krista chuh, mithi lak apat kaihthawh in a um hi tih hi thudik ahi a; mithite thawh mapuipa a hung hi tai. Himahlele, mitin, amah hun chiet zel ah hi'n tin; Krista chuh thawh mapuipa ahi a; zie nunga A hung kitna achun, Amah a te chuh hung hi'n a. 1Korinth 15:20,23. Paul in Krista Taksa a A thawhkitna hi gingtute thawhkitna gah masapen in ana gen hi. Amah a, tatsate cheng thokit ngei ngei ding tih a chetna ahi. Gah masa, buhphal masapen chuh thiempu masanga na hun chawih dinguh ahi. Thiempudante 23:10,11,17. Buh-at ngei ngei ding etsakna ahih bangin Krista Isu thawhkitna in le, Isu zala hukdamna change thawhkitna a namdetna ahi.

Gah masa Pathien mite chu midangte ettawn tak dinga a thientoh ngei ngei dinguh ahi. I Korinth 5: 6-7. Abraham leh gingtu masate a kisuk thientho bang ua, eiuh mite ettawn tak dinga, I kisukthientoh uh a ngai hi. Rom 11:14-16. Gingtute hi Belamno nungzui diktak I hih u a, Mithiengthote thientoh banga thientohna hinkhuo I mat dinguh ahi. Ziete haw chuh numei tawh kisubuok lote, nungak thiengtho bang a hi ngâl uh a. Ziete haw chun Belamno chun a chiehna lam chengah a zui uh a. Ziete haw chuh Pathien a ding leh, Belamno a dinga gah masa hi dinga lei apat a tatdawkte chuh ahiu hi. Thuphuon 14:4. Kum sagih sukgimtheihna hun a gah masa Israel mi 144000 hukdam aumte khah Lalpa dinga kikawih chuo, thil bangmah a kisubuoklo a, kikawih thiengtho ahiu hi. Gah masa Krista taksanna zala A nungzuite I hih ngal uchun Amah banga thientohna lampi hawh a, I hinkhuo I mat uh chu Isu kipahna ahi. Amen.

---00---

PATHIEN A MI LOPITE

JOHN HYDE

(SAWLCHAK PAUCHAM)

By: Rev. K. Lampu,
Shillong.

John Hyde hi mite'n 'Hyde paucham mi' ahihloleh "Sawlchak paucham" ana ti sek ui. Kristien Insunga kipata hung seilien ahi. A Insung ua thilpawimawh pena a ngaih u chuh PAUCHAMNA hi ahi. John Hyde a paucham gunchuhna ziekin a chate mi 3 in a damsung uh Lalpa nasepna dingin a mang tum ui. Chun, a pauchamna ziekin India mi tamtakte Lalpa nasem dingin a kipieu hi. John Hyde in Pathien a kimuhpihna mun chuh mun thiengtho ahi a, midangte et ding vangin a hinkhuo hi a thiengtho mah mah hi. A mel deihum tak mittui a dim leh Pathien masanga kap leh maua um leh kinuk dut dut pum in hitihin a paucham hi. "Aw Lalpa, Thagau mangthaite ei pie'n, akhutihloh leh thi ding ka hi," ti'n sun leh zan le khenlo hiel in nek leh dawn ding nasan le ngaihsaklo in, Lalpa kawmah a ngen tun tun hi. A taksa a dinga zawngkhal (thuoklah) khawp hiela paucham tu chuh

John Hyde chauh hiphie dinga ginchak ahi.

Smith Harris Hyde (John Hyde pa) chu Carthage a Presbyterian Sapchuom a Pastor ahi a, thagau lama mipiting leh taksa lam ale mi pating, paucham mi tak mai ahi, thiemna lam ale Doctorate Degree mu ahi a, mi kingainiem, hehpihna hau, pilvang leh kipahdan thiem mi ahi a, zie tawbang mah chun a zi, Mrs. Hyde le Krista batna nei, Pathien in aw hawihtak mai a piek chuh Pathien a dinga pie kit leh mang mi ahi. Dr. Hyde (John Hyde pa) hin Ho-In hileh amah Insung ah hitaleh a pauchamna thupi chuh, "*Buh neipa kienga Buh atding tamtak sawlding a nget hi ahi.*" Khutichu ahih ziekin a chate 6 laka pasal nih leh numei khat Chanchinpha gen dinga Lalpa'n a mat hi kuoma'n mak a sa puou hi.

Dr. Hyde in Lalpa na a sepna nasataka suklieta aum theihna dingin Lalpa a dinga a sep theih phapen pente sem zing

zing dingin a theihtawp a suoh hi. Zie tawbanga a kipiek zawhna ziek chun a chate haksatna haw hahpia thuok dinga a kipekdawknau ale a kipak mah mah hi.

HYDE COLLEGE A KAIHLAI:

M. Cormic Seminary a a kaihlai thuu a guolte'n a gen hawu khenkhat vak taklang hitiu. 1892 kuma John Herrick Johnson chun hiti hin a gen hi, amau haw Class chu: "M. Cormic Seminary Missionary Class" ti'n a minvawh hiel hi. A ziekchuh zie a simlai naupang 46 te laka chun mi 26 zet chu gamdanga Missionary dinga kipiedawk ahih ziekun. Zie te haw laka langsal deuhte haw chu, John Hyde (Paucham Mi) Korea gama kipan, Lee (Korea te Sawlchak) leh Foster (Haksatna thuoktu) tia ana minvawhteu haw hi ahiu a, amau haw hinkhuo hin midangte haw a hip mah mah hi.

J.F. Young in a gandan in, John Hyde hi a lehkhasimpihte laka chungnun chuomna nei leh thil bang ahima ki-ekawlna nei chuom diek hilo mi vantang ahi. Himahleh, a lehkhasim ahun zawh ding kum hin nasatak in lamdanna a hun nei hi. Zie a a hung kilamdana bul chu ahih leh, a

u Edmund Hyde hi zie mun a chu lehkhasim lai ahi a, amah a hung thih phutna zieka hi hung kipan ahi. Amah hi Hyde te unau laka a upa pen ahi a, gamdang mission field a dinga kipiete laka khat ahi. Amah hi mi mai mai ahihloh zie a guolte haw hin a het ziek un, a it mah mah ua, zie thu hin John Hyde chu nasatakin a kingaihtuoh sak hi. A u, Edmund thihna hin a lung a khawih bek ziekun amah hinna um nalai hi khawitaka bangti a mat ding ahim tih lunggel hun nei in, haksatna nasatak a nei hi. Nasataka lunghima kisuolna a neih ziekun atawp akhawng in, hiti hin ahun gen hi. "*Lalpa ei hehpihtu, chieh dinga nei deihna mun taphawt ah chieh ing ka,*" ti'n a kipiethai. Zie taka a kipiekthakna gah ziek chun a hinkhuo hung kitheng in, zie a kipat chun a guolte hawnle amah tawh kipawlkhawmna nuom asau a, a ngai thei mah mah ui. Khutichun, amah hi gamdang mission field a lunglut mi mah mah ahih ziekun khatvei a guol ngaihpen pa Mr. Konkle pindan ah zan dak sawmlekhhat vel hin ava lut a, ava holimpik hi. A guolpa chun thildang bangmah genlo in, "*Pathien masang ah amah thu thu hi dingin ngatha phawt inla, Ama'n thutanna ahun siemsak*

masangsieh ngak phawt in," tia ana genpih ziekin hun sawt tak tak thipkeia chu a kiholim zela a um nung un, mangpha kithak in a kikhen tau hi. A zinga a kimuh kit phat un, John Hyde chun a guolpa chu a khuta tu kawm in, maitai tak leh kipak tak pum in, Pathien in hetsakna a piek a muh zie (a het zie) a hilh hi. Zie ni a kipat mah mah chun, Pathien thagau kithuohppihna maktak mai chu a hinkhuo a muhtheih in ahung um hi, khutichun gamdang, mission field a sem dinga tak pen pen leh zie Seminary sunga thilhihthei pen khat ahung suok hi. John Hyde hin, "Midangte a dinga paucham sak chu amah chanvo bik in a kilak hi." Pauchamna chuh thil nasa zawsem hihtheihna lampi a hung suok ta a, amah hinkhuo a a nasep ahung hi tai, aziekchu, pauchamna hin thilhihtheihna maktak nei ahih ziekin. Amah hi pauchamna meisel, vakna leh lumna nei ahung hi a, a goulte'n a deihumna leh a lopina kipahppih in a pakcha mah mah ui. John Hyde mi hinna chun a zawh ziekin a guolpa khat chun Korea gama missionary a kuon dingin thupukna a siem hi. Zietak muna chun kum 30 val na ava sem a, Ho-In 67 a phutdawk hi.

Khangdawng ahih lai a kipat John Hyde in Missionary nasep a tup zing zing hi. Missionary pha hiha, minthanna lopi tak neih a, gamthim salhvak a nuom mah mah hi. A lehkhasimna ahung zawh a, amin bana, B.A. tih zikbeha aum bang in a kisaktheihppih thim hi. India pau kizilna ale thiem mah mah a ut ziek in, thildang bangmah a kisubuoil o a um ding in thupukna a siem hi. Missionary lien, lopi a hung hih ding dala a um khak ding a lau mah mah hi. Zie hi a thiltup lopi chu ahi a, a tamzaw chu taksalam khuolna ana hii. Pathien a hehpih mah mah a, a nasep le a nuom mah mah hi. Himahleh a thiltup cheng cheng kingakna (foundation) chuh Pathien mah ana hizing hi. John Hyde pa guolpha mah mah Pastor khat chule missionary a kuon ut mah mah himahleh a thiltup guitunglo khat a um a, amah ngei kuon theilo ahih nungin a guolpa chapa missionary a kuon ding um thei tih a ngaihtuoh leh a kipahppih mah mah hi. Ziekchun, Hyde hi apa guolpa hin a lungsiet mah mah a, a deihsa a, a pakchai. Hyde hinle a ngaihtuoh in a lungsiet in a ngai mah mah hi.

John Hyde India a nasem dinga

kuon chu New York a kipat lawng (streamer) ah a chu a, amah umna ding pindana ava lut leh, alekhkathawn ding khat ana um hi. Zie lehkhathawn chuh apa guolpa khutzik ahi a, thu tawmchah a zik hi. John Hyde chun a vak hawng a, a vak sim leh a lung ana mah mah mai a, a lehkhathawn chu a nuoitawm a, a umna pindan ningkhat sehna chun a nei hi. A lehkhathawn a lungthim sunapen chuh ahihleh zie hih ahi: “Deihtak John, thagaua na dim masangsieh nanga dinga paucham hai puong ka,” tih ahi, a lungthim in hiti hin a ngaihtuoh a, ei hun tih dan hi thagaua dimlo na hi ei ti nuom dan ahi, missionary a kuon guo kihi a, missionary phatak hih tei kiguo a, zie mipa hin zie nasem dinga hi tinglo leh thagau thuomna changlo ei tih mai chu ti’n lungna mah mah kawmin a vakviel hi. A lungthim a chun zie thu haw chu gi zing zing in, a ngaihtuohna nasatak a kisuola um in, nuom a sa hiel puoi. Mahleh zie lehkha zikpa chu a ngaihtuoh tak leh a mi hinna a ngaihnat mah mah leh a hinkhuo a thientho dante haw ettawn tak mah mah mi khat ahih ziekin, hiti hin a ngaihtuoh hi. “*Amah gen hi dikzaw khatto hi ding ahi, kei mah kikawihna sangin, kei*

hi missionary nasem dinga hi tingzo lo mah hikha ding ka hi tih ngaihdan a lungthim sungah ahung lien zaw tai.” Tichun, a pindan sungah valut kit in, a lehkhathawn nawihtawmsa a paikh kha ava hawldawk kita, phatak a zutnam thak in a sim kit hi. Khutichun, a lungthim chu a buoi mah mah nalai a, himahleh atawp tawp in a lungthim ah a pa guolpa hetdan dikzaw a, kei hi diklo zaw hiding ka hi tih ngaihdan (conviction) lientak a hun nei hi.

Zie kihetdawkna hin hun bang ahim chan a daih hi, lungkham tihtakzet in a lungkham a, atawp tawp in lungzinna tawpkhawk tawh, tihdan ding nasan hechuom talo in, Pathien maangah a kipielut hi. Lalpa kawma Thagau Thiengtho thuomna a nget phet in, a buoina haw cheng cheng hung bei vek hin a he tai. Khutichun, amah leh amah ahung kimuchien tai. A lungthim in bangti tienga mahni angsungkhuolna nei puma thiltup ana nei ka him tih ngaihtuoh kawm in a khuolzin sung chu a lungthim a kisuol suol mai hi. Bang cheng chu hitaleh lawngchawlhna mun a tun masang ngeia Thagau Thiengtho a dim chu a lunggulh

zing zing hi, bangtienga aman piek ding hilele. Chun, Pathien kawmah zie bang hin a ngen hi. "Lalpa Thagau Thiengtho a ka dim theihna ding ahih phawt leh India gama pau kisinna a lawhsam in, kuomah hetphakloh leh muhphak lohna muna na semlo in, um lengle ka nuom hi, bangti tienga aman piek ding hilele kipie'ng ka," a tii.

India a hungtun nung hun chawmkhat nung chun missionary khat hi tawh a kihetuoh ui. Zie pa chu Pathien mi mat khat ahi a, khawlaia thugen dingin a kipan ui. Missionary pa chun khawlai thugen chu ahun pan ta a, Hyde chun phatak in ana ngaitha a, Isu Krista hih gitlohma laka kipat, A mite hukdampa diktak ahi," tih a gen a, a gen zawh phet in thugen pa kawma chun mi zahum tak melpu, English thiem mah mah khat hin hitihin ahun dawng hi. "Nang ngei hile zie a na gendan achu hukdawk (hukdam) a um na hita?" ti'n a dawng a, zie a thudawtna chun John Hyde lunggil a sun mah mah hi. Hyde chun hiti hin a hun gen hi. "Zie dawtna hi kei kieng ngeia dawt hitaleh Krista'an kei hi bukim keia ei hukdam nailo ahi, tia kiphuong ding ka hi, a ziekchuh, ka hinna ahi

gitlohma lakmang nailoh um nalai ahih ka hetchet ziekkin. Mite haw laka ken Isu chu ei hukdampa ahi tih kikopih pih in, ama'n kei hi ei hukdam nailo bang ana hileh bangti tieng lawm lawma zahchak um ahi ta dem, tih hi ka kihechien zaw sem hi. Khutichun, John Hyde chu a pindan sungah a chieh kit a, kawt kikhakkhum in, Pathien kawmah thil bang ahim khat bek hihsak dingin hah nget in a ngen hi. Zie chuh a gitlohma cheng cheng chunga guolzawhna, abika nicheng gitlohma amah subuoi zing zingte chunga guolzawhna a piek ding in. Khutichu ahihloleh America gama vaihkit a, nasep ding dang hawl mai loh chu ahi ding dang a he ta puoi. 2. Amah hinkhuo ngei ale guolzawhna a hetchet aumloleh Chanchinpha gena ding dawk theilo ahih dan Pathien kawma gen in, Lalpa chu a buon hi. Pathien in a gitlohma cheng cheng lak akipat a hukdawk thei a, a hukdam nuom a, amah a dinga a sepna India gama a guotsak ahi tih Pathien in a hetchet sak (assured) masieh chu a dawtna haw chu ngaihtuoh kham in a ngai a, Lalpa a ngak hi. Lalpa'n hukdawk tak tak ahi nai tih kichien takin a hun hechien ta a. Zie a kipat chun, bangmah lauh him him neilo in, Lalpa'n

vangsakna a piekte haw chu a gendawk tai. A Lalpa leh a hukdampa Isu Krista muonumna maktak midangte haw hilh a hetpihtu a pan chu a utpen leh a kipahna pen ahi. Hyde in amah gitlohma haw a gentak leh lungkham mel a pu sek a, Krista muonumna a gen tiengleh kipahmel pu tak leh maktak in a gen sek hi. Atung lai in, John Hyde chu Missionary challang pawl ahi puo a, midangnal genthei le ahi puo a, zie malak chun a beng le a ngawngthim a, mite'n a hopih tak ulele changtak in a dawng zieng thei sek puoi. Mahleh mi nunnem leh hehpihna hau mah mah ahi a, midangte et dan chun missionary dangte banga phatchuom ngaihna leh lunglutna tasam deuh batna le nei in a kilang hi.

India a a septung lai in pau a zilsak masau a, himahleh aman pau zilna a hun mawkmat beih chu a ut puoh a, Bible Study a hahbawl hi. Committee te'n a gai ua, hiti hin aman a dawng hi. "Akul masa sep masak" ahi a tii. Zie a gennawp pen chuh a thu a sinsak theih masang leh pau a het masanga Matchak ding Pathien THU het masak ding tih ahi a, Thagau Thiengho in a thu maktak in hetthiem na a piei. Zie chauh chu hilo in, a pau zilna ale

Lalpa'n a panpih a, Urdu leh Panjabi pau le a hung thiem ngal hi, India pau a thiemtak mai a Pathien thu ahun gen leh a ngaithate'n awn hiel in a ngaitha sek ui.

1904 kum in, Punjabi Prayer Union kiti khat a hun pandawk a, zie a member a pang nuom te'n dawtna bang zah ahim kisiem nuoiah a suoi uh kai in, a pang zel ui. Zie a dawtna pawimawh haw chu zie haw hi ahi:-

1. Na hinna a Thagau in na a sepna dingin na seppihte leh na Sapchuompihte chunga Thagau Thiengho thilhithiehna a tun theihna dingin na paucham hi?
2. Thagau Thiengho thilhithiehna (thahatna) leh na nasepna a dingin na lunggil Thagau Thiengho thilhithiehna tello a malam sawn theilo na hi tih na kingaihtuoh sek hi?
3. Isu Krista na zahchakpih lohna dingin na paucham kha ngei em?
4. Thagau a khanlawhna na neihna dingin, pauchamna hi van mat lopipen ahi tih na ngaihtuoh ngei em?
5. Thagau a khanlawhna a hungtunna dingin ni chengin na sunnung hun dakkal kimkhat bek na

pie zing hi? Thagau a khanlawhna ahungtun ma cheng na paucham zing zing nuom die?

John Hyde chu Panjabi Prayer Union ahin a bula kipat a pang a, Sielkot khawpi ale chanvo a nei hi. Zie a pauchamtute hin Krista thupiek bangin a mituh a hakto ua, “Buh at hun mah mah” lo haw a mui. Thagau Thiengtho nasepna chu pauchamna a kipata muh ding ahihdan a hetchet ziekun agah (vangsakna) a muh masangsieh uh nasataka paucham dingin a kipieu hi. Welsh Revival ah Pathien in Evan. Roberts mangin, mihingte nasepna um tamlo hiel, Thagau Thiengtho sungtha'n na a sem hi. Sielkot Revival a dingin Pathien in mi nasatakin a kisaklawksak a, vana kipata hung tungsuk ding Thagau a halhthakna chu, hun sawttak akizawma nasataka pauchamna, kipawlkhawmna leh nuomtaka ngaihtuoh lawk (definite planning) in aum hi. Zie Sielkot Khawmpa hi tawh kisai in mi tamtakte a paucham

zing zing ui, ziete haw laka chun mi thum (3) a hahpan diek aum ui. Amau chuh (i) John Hyde, (ii) Peterson leh (iii) Turmer te ahiju hi. John leh Peterson hi ni 9 hiel ana paucham nungun Turmer in ava behlap a, amau cheng thum hi ni 21 leh zan 21 sung a paucham tum kei ui. Zie umzie chu ahij leh a kipatnia kipat in, “Ni 30 leh Zan 30) sung ving veng paucham in leh Pathien pakcha'n a thilhihtheihna mak leh lopi hunsuoh dingin Pathien sam in a um ui. Amau cheng thum lunggil hi mi khat lungchang guol mai in a um a, a ginnau hi Pathien thilbangkim hihtheipa tawh, pin leh khau guol in a kizawpmat hi. India gamsunga thagau mangthai simsenlohte a dingin kinepna lientak nei pum in, kap kawm in lungsietna nasatak nei pum in, a paucham zing zing ui. Ahun kichaihna ah Lalpa muonna ziekin hiti hin ahun gen ui, “Hih a um ding ahi” (It shall be done) ti'n a kiko ui. (Aban um zel ding)

---o0o---

Ngetna

Chamna aw hi subscribe a, Articles a hun pie zing ding in leh subscriber ding hun hawla sponsor hun bawl zel ding in, chun aphung vukna ale pang dingin na tawmngaihnau leh dehsaknau Pathien min in ka hun ngen ui.

- Editorial Board

ZIE TAKA HIH BANG HIH NA HI?

By: Evan. V. Lienthuom

“..... Chun, zie taka kawlpuk khat chu a va tung a, zie tak achun a um ta a; chun, ngaitie, Lalpa thu chuh a kawm ah ahung tunga, a kawm ah “Elijah, zie taka hih bang hih na hi?” a ti a (I Lengte 19:9)

Laphuoktu'n, “Khawvel hawihna cheng cheng hi kumsawt ating zo puoi, mahleh ahawihna I hawl zing ui” ana tih bangin, Lalpa a dinga kimat zing sang in, I muh uleh bil a I zak hawu hin, Lalpa kawm ei naihsak sangin, ei gamlat zaw sek hi. I vak gen nawp pen chuh um lohna ding muna vak umna hin, gitlohma ah ei puitl a, zie a lut chuh Lalpa apata taihmangna ahi.

Jonah kha Pathien in Ninevi khuo lopi tak mai ah thugen dingin a sawl a, himahleh a utlo mahmah mai a, aziek chuh Ninevi khawpi chuh Assuria te khawpi ahia, zie Assuria te hin Hebraite hi ana hah bawlgimtheih bek ziekun leh sala mantu ahih ziekun, amah a dingin le amah sugimtheite kawma chanchinpha ava gen chun kisik leu Pathien gawtna tuok puoh khan au tile hiven ti, tunia le I mi muhdahteau

chuh Pathien in sawisa diek leh tia I na gal thil sek bang u hi hiven ti.

Lalpa nasechte le a utnau mun chauh u ah Lalpa'n a sawl khel khel puoa, ahaksatna mun leh a dahna munteu ah ana sawl zaw sek hi. Zieziekchun, Krista hehpihna chun a chamlo un a sawl a, muol leh tangsang mahleh chieh dinga ana kisa sek ahieu hi.

Ahinla, Jonah vang ana ut ta puoi. Bible in Jonah chuh Amittai chapa ahi atih hi vak en leng. Amin put ua pat hinle, Pathien thu tangsappih ding chuh ahi nai tih achien hi. Amittai tih hi 'ka thutak' tihna ahia, Jonah kiti chuh "Vapal" (Dove) tihna ahi. Zie hunlaia lekhathawn puoviel a kimang sek chuh Vapal ahia, zieziekchun apa tawh amah mina pat hin 'ka thutak puoviel' tih ahung hihna tawh kitawn in, Lalpa'n a sam a, himahleh

kihetloh sakin Tarsis kiti lam zuon in, tuisuohgiet a lawng khat achun ana taihmang guo tai. Jonah hih awihmawh a um hi, ahinla ei haw le Lalpa'n ei sawlna muna um ding I dah thei mahmah ua, bang bang ahim lawha umloh theih teina ding guonggalh ham ham te'n le a liekyah diek puou hi maw! Kei le Lalpa'n Amah a dinga kalsuon dingin ei sam sam seka mahleh Jonah guola taimang in, kilepna ding pha taktak ka guonggalh seka, phachuom lo ahi. Tuilangkuol ah chieh ah ei kitih leh Imphal lam zawt mai kha Jonah I batnau khat ahih ziekin alauh um hi.

Jonah le mallama chieh dinga a sawllai in, simlam a zuon hi, aziek chuh a ngaihdan u chun tuisuohgiet chunga I um leh Pathien in ei muthei puoi tih hi Juda te'n ana ginchak uh ahi. Jonah chutna lawng chun tuohsie ahun tuck ta a, huihpi nasatak in a lawng chuh a hun sawisa ek ek mai ta a, lawng a chute chule a lau mah mah tau hi. Ka vak gennuom pen chuh, *lawng chunga umlo ding, Jonah a um ziek hin tuokloh hiel ding a tuok lawh ui.* Agen vang ueh huihpi nun hunle ei puoi a tiu a, ahinla a umlo ding pa aum ziek ahi tih hi achien ngal mai hi

I gam leh I sapchuom sunga sietna huihpi hung nung sekte

hile bang ziek ahi dem? I tih leh a dawnna hi a gamla hiel puoi, umlohnna muna umte ziek ahi sek hi. Piengthak lo, kikhawm khalo hiel leh pauchamna mawng mawng nei khalote ziek hin buoina atung puoi. Ahinla ei uh Pathien tawh kicham ta, testimony le hawihtak tak mai nei ta, ahihvanga umlohnna muna I hung um tieng ueh zie sietna huihpi hi hung nung sek ahi zawi ka ti nuom hi. Zu dawnte chuh zu In a aum ueh a umna ding mawnguh ahia bangmah a susie puoi. Ziezieka chuh umna ding lo hiel a I um tieng leh ei u chauh in kithuok lo in, midangte'n le ahun thuok lawh sek ui.

Huihpi leh guohpi anasat bek zieka mipi lau tak maia aum lai un, Jonah chuh nuom takin a ipmu heuh heuh mai hi. Lalpa apat mi ahung taihmang tieng leh, a mipite'n bang tawbang in thuok ta mahleu amau a kingawh him him puou a, khawk le a sa thei hiel puou hi. Khutichun Jonah chuh ava phawng ua, "Nang ipmu pa, bangti dan a ipmu maithei na hi?" a tiu a ava kaitho ui. Tunia a tamzaw hile gingga mite phawnhalh ngai, Kristien minpu hi a kitam a, ziezieka chuh I um lohna dinga I um tiengleh I mawhpuoknate hile ana ki-ihmutsan maithei ahi.

Jonah a kaihtho zawhun a dawng ua, khawigam mi na hi? Khawi apata hung na hi? Bang nasem na hi? Bang nam na hi? tih haw a dawt phat un, Jonah chun kisel loin ahihna tak a gena, tuisuohgiet leh leisiet siempa apata taimang ahih dan diktak a gen a, huihpi, guohpi nun ziek a he tau hi. Tunia ei laka huihpi nungte hih kuo ziek ahih kihethei talo maw le? Ahihkhiel leh Lalpa apata taimangte le ki-kipietha (surrender) ngamlo, ziezieka chu ki-kingawhtuoh, damna ding umthei talo ahi. Khat in khat ngawh viel hin I gamsung bangti kisiemphat ding ahi ta? Zietawbang haw chuh a thu het uh leh gen uh zuilo, thagau a umlo a, thagau thu gen gen ziengte leh, lungsietna nei sam lo hiel, lungsietna thu gen gen ziengte ahi sek ui.

Pathien in umna ding a hilh he mah mah, hilele zietaka chuh um dieklo, a um lohna ding muna um ham hamte hi mi lauhum ahiu hi. Aziekchuh, “*Pathien thu a gen thei a, gitloh a haw diek puo a, a gen zuilo hiel ahiu hi*,” mi’n ei ti sau sau sek ui tih hengilh puoi tiu.

Elija khale a umna ding taka aum lai in Lalpa’ン zawhna a pie a, Karmel tang ah Baal thiempute, a masang ah a muolpho zo tau hi. Ahinla

Lalpa zala zawhna changtu Elija kha numei vauna lau in a taimang ta a. Gamla taka taimang in Beerseba khuo ah a suok nusieh in, Jordan gal kan in a tai a, atawpa a chauh bek phat in Juniper thingnuoi ah bawk in, Pathien kawmah thih a ngen mai tai. Umlohma ding muna umte hi Elija guola thih nget nuomna hinkhuo hi kineithei ahi tih hetngilh loh dingin apha. Hinkhuo haksa leh thawmhauhna, khawvela dinga le kimang tak tak ngam manglo, Pathien thu le awi taktak diek ngamlo, hinkhuo laklawh leh thawmhauh um takmai hi neih theih ahi tih hetngilh loh apha. Khawvel ahin kipahna ding hawl in zu, drugs leh numei pasala nawpsakna hawl mahleng le deihkhawp leh kipahna kim aum puoi.

Lalpa apata I taihmang a, khuochang helo guola I um lai in le, Lalpa’ン a hehpihna’ン ei umbichilh sek a, lawng sung, ngapi sung, Juniper thingnuoi leh Horeb tang tieng ah taimang mahleng, Lalpa’ン ei delhzui zinga, Aman ei hawldawk zel a, a thu mangin ka hehpih, zie taka hih bang hih na hi? ti’n ei sam zing hi. Ei hung hawldawksa ale kisel san tei tei nalai ding I hi dem?

Nang na hung kileh kit ziekin sietna huihpi kinawkte khale a thip chawt maithei hi. Jonah tui a paiah ahih a, huih a thip bang khan, nang vaihkitna ziekin zie sietna huihpi chule a thip thei hi tih hezing in.

“Hun muolliem sa Lalpa lo in Hunpha tampi alien zo Hung kit lo di'n muol alien tau,
Hun um nalai hi bangti'n ka mang dem?” tia pan lathak dingin Lalpa'an simtute ei malsawm chiet tau hen.

---o0o---

MI NUNGCHAWN

By: Rev. Khaitinthang

Bible changtel: Jona 1:1ff

Tuni'n Thiemgau neu Jona chanchin apat leh a hinkhuo apat hin sermon chawmcha ana en leuhing. Jona 1:1 apata hih I sim chun, Amitai chapa Thiemgau Jona kawma Pathien thu hungtun dan leh, Ninevi khuso a Pathien thu gen dinga sawl ahih dan a kimui. Ahinla, Pathien thupiek ngaihsak lo a, amah nawpna leh Pathien masanga pat Tarshis gama a taihmang guotna le a kimu kit hi. Ziezekchun, Jona hinkhuo leh thusim apat hin mi nungchawnte leh Pathien apata taihmang guote dinmun neukhat ana enkhawm hitiu.

I. Mi nungchawnte chuh mahni deihdan in a um ui:- Jona hih Pathien in Ninevi khuso a a chanchinpha gen dinga a sawl hina zen pi'n, amah ngaihdan leh amah deihdan in Tarshis lamah a chieh zau tai. Aban I sim zel leh, Pathien in a delhzui zel a, tih thu a kimui. Mite hih, Pathien apata a taihmanga, Pathien tih loh dana a um phat leh mahni deihdan, ngaihdan in, Pathien thu'n bangti'n ei sinsak em, tih umlo in, mahni lemhet dan dan in a khuosau in, a hinkhuou a mang sek ui.

II. Mi nungchawnte chun mahni angson a khuol sek ui:- Jona chuh, Ninevi khou a bang thil ahung tung dem tih ngak in a khou a kimuhna achun, buk kisuon in a ngak hi. Ninevi khuote chansiet ding leh Pathien gawtna hungtung ding chuh a galthil mai tai. Ninevi khuote hih Pathien in gawt tei henla, a phuba hih la leh tih hih a utchak pen ahi. Sapchuom sung leh Kristien hinkhuo ahinle, mi tamzawpi hi, midangte'n chanpha a chan ding uleh vangsakna a chan dinguh, puo-na leh itthik a, a sep ding bangtak semlo le tamtak um dingin ka gingchai.

III. Mi nungchawnte hih a phunchiek ui:- Jona hile Pathien in a lieh ding zan khata a piek a lakkit chungchang ahinle, a phunchiek a, chuleh Pathien in Ninevi khou gawtlo a a ngaihdam ziek hin le, nasatak mai in Pathien kawmah a kiphin a, a hin sanga thih a ut a telzawk thu le a kimu kit hi. Tulai hinle Sapchuom sung leh Kristien hinkhuo ahin, mi tamtak in phunna ding leh kiphinna ding hawl in a um sek ui.

Zie hi bangmah dang ziek hilo in, Thagau lama a hisel loh ziek u leh a nungchawn ziek uh ahi zawi. I Lalpa Isu'n mi damtheite'n Doctor a ngai puo'n, mi damlote'n ahi a pawimawh uh, a tih guol in, mi a hung hisel loh a, natna ding a het tam guol in, mi nungchawnte hin le a hau ui.

IV. Mi nungchawnte'n mipite a subuoi sek ui:- Jona ziek in kuongpute leh kuong sunga um cheng cheng in buoina a tuok lawh ui. Buoina a tuok chauh ule hilo in, thil pha tamtak a chan lawh nalai ui. Sapchuom leh Insung ahinle khat Pathien lauhna ziek leh khat in Pathien lung a suk-awih ziek in vangsakna a tun thei a, khat phatloh ziek in le sietna leh chamna a tun thei hi. Mi Pathien a a taihmang gamlat phawt leh a suksiet le alien zel mai hi.

V. Pathien in a mite hih a thahtham puo'n a delhzui zing hi:- Jona kha bangti'n Pathien kilepsan in, Pathien apat in taihmang guo mahleh, a delhzui zing hi. Zie guol chun, mi kuole Pathien a hinna neitate leh Pathien chate hi bangti'n um leule Pathien in a mu zing a, bangkim ah, amah tih banga a um kit theihna dingun, a enkawl zing hi.

VI. Mi nungchawnte hin dawtna tamtak a tuok nuom ui:- Jona hi kuongpute'n dawtna tamtak a dawng ua, aman le kisuonglah tak in a dawng zel mai hi. (1) Khawigam mi na hi? (2) Khawi apata hung na hi? (3) Bang nasem na hi? (4) Bang nam na hi tih haw hi aban cha'n a hun dawng tau hi. Gingtute leh simtute cheng Jona guol ahih dawtna ei kidawng ding hileh bang na ti die?

Ama'n chuh a mihihna cheng a gen zawk in, tuisuohgiet leh van siempa Pathien ho ahih dan leh a masang apata taimang ahihdan le a genbeh nalai a, zie khel achun, amah zieka buoina um ahihdan leh amah ziek mah a buoina kithiel ding ahih dan le a hesawn nalai hi.

Zieziekchun, tuni hin zie Article neucha simtute cheng cheng in, I Sapchuomte, Insungte leh khawtang sietna leh buoina haw hi ei zieka tung, ei zieka veng thei ding leh pha thei ding ahih phawt chun, Jona guol hin, I hinna tieng le phal in kipie leng vangsakna tuntu hi zaw thei ding I hii.

Lalpa'n simtute cheng athak in ei vangsak chiet tau hen.

---o0o---

D. MUNLUI SAPCHUOM LAKLUTNA

D. Munlui, Henglep Sub-Division (In 30 vel) chuh hun chawmkhat Local Sacphuom a ana kipuok nung un, amau deihna bang leh ESC Executive Committee thupukna dungzui in, July 14, 2019 (Sunday) ni khan anuom-ahak a, ESC Sapchuom tawh Pathien Lalgam na semkhawm ta dingin, Rev. T. Kamgin Gangte, Executive Director, ESC'n Laklutna a nei tai. Zie hun ahin, Upa Paozalun, Chairman, ESC'n Pathien thuchah genna a nei hi. Pathien in D. Munlui Sapchuom hin Lalgama dinga na tamzaw semdawk thei dingin amau pui zel ta hen.

KROSS THUOH THUM

-Rev. L. Sata

Kross thuoh thum vak tih zieng hin Kross thum a um hi tihna ahi puoh a, gingtute hinkhuo piting, Kristien bukimna (Christian perfection) I tun theihna dingin gingtu hinkhuo kalbi nei guola gen in, Kross thuoh thum ti a vak kigen mai ahi. Gingtu mimal tin in pienthakna neih nunga mahni dinmun chiet apat a masawn theihna dinga zie thu hi kisulang ahi. “Bang hi ta lele I phakna tieng u apat in malam zuon zel hitiu” (Phil.3:16).

1. KROSS THUOH KHATNA:

Gingtute'n Pathien cha hihna kihetchetna chuh Kross thuoh khatna ahi tih ana ngaiantuoh sin leuhing, suol simna leh tisa thilhiah chichuom chuom apat kithieldawkna feltak nei samlo a, piengthak hi ngei a kihetna gam hi gen guo I hiu hi. Zie a cha hihna kihetchetna chuh Bible chun ‘khamlawnka’ ti'n ei hilh hi. (2 Kor. 5:5). Zie dinmun hi Isu Krista chuh I taksa thih tak tak ngailo a, I thasanga a hung thih zieka ei uhi hinga kingaihna hi ahi. Van gam kaih thu achun thamuonna chuh I nei ngei u a, pahchakna lasak leh paucham nuom saknate bang, kiheina lam cheng chuh thil thak veka hetna, mahni ngei le mithak hi a kihetna ahung um hi. Lunggel dan ahung lamdang a, thil hihkhelh leh alang thei lama gitloh taihsan a, thilpha sakhuo lam thil chauh hih ta dinga kipumpiekna leh tup dan kitheng a, lungthim chieh dan hung kitheng lamdang tak chuh a chang sek ui. Amahvang chuh Kristien hinkhuo a etdan chuh mahni kipiek tamna apat hatna leh thilpha tampi hih a gingtu hinkhuo piting neih guotna ah a puilut deuh pen mai hi. Zie dinmun hi, “Piengthak tisami” Bible in a tih hi ahi (I Kor. 3:1-5). Piengthak tisami chun a thilhiahphat chuh Kristien hinkhuo a hihsak mai a, pawlam muhtheih suol a zo a, sunggil lam suol ngaihkhawknna chang a hepha puoh a, nasepphat in Krista nung a zui tun tun sek hi. A lungthima suol hung lang sek chuh Pathien kawm ah ngaihdam a ngen a, lan thiengtho guon a paucham sek hi. Thagau thiengtho chuh tisa taka chan a guo a, lungthim pha a tawih haw chuh malsawmna

sukpunna dingin Pathien kieng ah a paucham tawp tawp sek a, mahni kilat meng meng na chun khanlet a guo sek hi. Amah hih banga hih ngapolute chuh niem a sa a, thagau lama thuktak a kihetna'n a sungal sek hi. Amah chun Bible thu sangin pawlama dawn theih thagau hungtung ding chuh a ngak pen sek a, a taksa chung ah bangti ahim a hetna neih hiel a guo sek hi. Pathien aw chuh lungthim a het guotna nei in a hawl sek a, lungphut kinawh hiela hetna chuh Pathien nasep hi veka pawmna a nei sek hi.

2. KROSS THUOH NIHNA:

Cha hih kihetna kichien tak chan/neih nungin gingtu hinkhuo ah I hihna ding tak dinmun I tun theihloh zie kihetchetna apata dangchakna giltak hung um kit ngei ngei ding ahi. Pathien thu lamdang tak athaka hetna hilo, I hetsa I hinna'n a chup phaklouh kihetchetna leh kisitna apat in zie Kross thuohnih gam hi lut theih ahi. Zie chuh ei mah ngei Kross a sukmangna hi ahi a, pienthak huna gitlouh kihetna sangin aleh tamtak in ana zaw a, mihing suolna lam chauh hilo in, I phatna lam, hehpihnate, kingaihniem theihnate, zaidamnate, Pathien thu deih mah mah nate, kipiek ngam mah mah nate, tangphalnate, mi gimthei lungsiet theihnate, piengthaklo veinate, gamthim veina tieng in Kristien hinkhuo ana hi puoi tih hetchetna tak tak hung kilang kit ngei ding ahi.

Pienphunga phatnate leh a deihumna haw cheng hile thitha lamtuol chauh ana hi tih mahni ngei a awihfelta, chu thagau thiengho nasep ziekin ahung um kit sek hi. John Wesley thugen minthang chun, a pienthak zawh a mi sangnga lam hiel a thugen a a pienthak nung un, zie hinkhuo hi a mudawk a, "Kei mah hi suolna leh thitha kichawkhel biel buol ka hi tih thagau in ei hetchet sak apat in, vangsakna nihna hi ka hung chang tai," ti'n ana gen hi.

Zie thu zikpa hi kum tamtak Pathien thugen a ana kimangta, pulpit mun chuom chuoma thugentu, Camping vel tamtak lawhting taka a neih nungin thagau dangchakna thuguk a nei zing hi. Zie haw cheng ban ahin suol kihetna lamdang tak nei kit in, lungthima Pathien mina thil cheng huoma kipandawk sek chuh tisa thilhih leh nasep ahihdan Lalpa thagau in a hetdawk sak a, a kipiek theihna cheng a subei a, Lalpa a hehpihna lunggil tenum zie chu Lalpa'n a muhsak beh nalai hi. Tichun, Pathien

hehpihna mak, Krista hinna chu a hinkhuo pumpi tuomtu ahung hithei tai.

3. KROSS THUOH THUMNA:

“Kei chun chuh I Lalpau Isu Krista Kross lo chuh ka suon loh ding zie mai chuh, zieiekchun, khawvel hi kei dingin khetden ahi ta a, kei le khawvel a dingin khetden ka hi tai (Gal.6:14; Phil.1:20, 21; 3:8-11).

David chuh Ho-In thiengtho sa tak ahih takloh ziek in a chapa Solomon chuh Pathien in leng dingin a tel zaw tai. Solomon pauchamna chun Pathien a sukipak a, a ngetloh hauhsakna leh lopina a pie a, hauhsakna piek behlap in aum tai (I Lengte 3:5-14). Solomon chun thagau lam chitna cheng cheng chuh thiemgau Nathan apat a zil a, Nathan chun Solomon chuh a hehpih mah mah a, amin chuh Jeddah ti'n a sam a, a umzie chuh Lalpa ngaih zawng tihna ahi.

Solomon chun Ho-In lopi tak a sadawk hi. Bible ahin Ho-In chu amin in nga (5) um a gen theih ahi. A masapen chu thalek Ho-In (Biekbuk) Puon In ahi. Anihna chuh Solomon sak ahi a, Biek In or Ho In diktak chuh ahi. Athumna chuh saltang vahkit zagh a, Jerubabel makaih a sak kha ahi. Alina chuh Isu lei a a lenlai a Herod Temple or Ho-In sak kha ahi. Angana chuh Ezekiel Biek-In or Temple ahi a, thagau lam thil thuktak genna ahi (Eze. 44:19).

Solomon Temple sawng thum kiti hin gingtu hinkhuo sawngthum a um hi tih a hettheih a, mun thiengtho khatna chuh pienthakna guol in gen ta leuhing, mun thiengtho pen chuh mihing lui thihna zala hinna lopi tak hung kilang chu tawh tehkal hileh, Athumna chuh mun thiengtho pen apat kilang lo, Cherub te tha liehkhum khela zahngaihna Lalchutphah um chu ahi. Gingtu hinkhuo sawng thumna chuh Krista lungthim sunga Thagau Thiengtho nasep chawl ngeilo, vak dawnna chuh ahi. Chapona leh lopina'n mun a nei ta puoi.

(Zie article hi lehkhabu khat ka simna apat hung kilakhawm ahi a, gingtu khatlenih bek in phatchuomna a muh lawh khak uleh ti a hung kisuoh ahi).

---o0o---

EL-BETHHEL REVIVAL HUIH NUNG KIT LE UT UM E MAW

By: Kaizomlal

Sapchuom leh mimal a I hinkhuou ah Revival hi ahung tun loh tiengleh mihingte hi a kigaw deuh deuh a, Lalpa pawl na lama le kihul deuh deuh mai, zie apat hung halh dawk na chang I het loh tieng leh melmapa setan in mihingte chung ah nasatak in na hun sem in, thatdah na lampi a ei puitul a Lalpa leh ei kikal gap sau tak mai ki-fellowship thei lo in ei kawih a, sapchuom kikhawpna, numei kikhawpna, khanglai kikhawpna a thatdahna addict in ei hun mat tiengleh suohchak guo mah leng un, suokcha theilo a setan thang a awk mi tamtak I um lawh ui.

Revival in mimal leh sapchuom ah Pathien in na ahun sep loh tiengleh nasatak in halhna a tung thei puo a, sapchuom leh insunga Lalpa apat akigamat tiengleh, I hinkhuo kipiekna, apat tuina (kipakna) um talo kihul deuh deuh mai, lunghima utna mawng mawng um talo, zie ziek tak hin Ho-in a, kipak a lam a khut zak le muh ding um talo, Lasak le tui ta lo, mel ale kipahna mel muh ding um ta lo, tuni a sum leh pai taksap ziek hi lo ,neih leh go ziek a taksapna hilo mahleh I taksap pen leh pawimawh chuh Lalpa thu hetna lam a ki-elna ahi. Bible text Amos 8:11 zieziek taka hi sapchuom leh mimal a halhthakna tung theilo, Lalpa'n a thu a ei pawl halh zo talo, khawvel lopina'n I hinkhuo ei zo taluo ta, Lamka khawpi a Halhthakna El-Bethel revival lopi tak mai in Churachandpur pumpi ei zel suok lai in mipy sang tam tak, nambing umlo in lungkituok tak a I lenkhawm lai uh I gel kit leh ngaih aum sek hi. I Christian hihna (identity) atak tak pa kha mi cheng in akisulang chiet a, zie guol a El-Bethel Revival lopitak mai khan Lalpa'n Pastor, Upa, Evangelist, Sapchuom nasemte leh Nu leh Pa, khanglaite hi hung veh thak kit le ut aum na e maw. Lalpa'n a thu sim cheng I mimal chiet u ah ei vangsak chiet ta hen.

---00---

EVANGELICAL SYNOD CHURCH
BOARD OF CHRISTIAN EDUCATION
Secretariat, Chiengkonpang – 795158

SYNOD BIBLE SCHOOL
DIPLOMA IN BASIC THEOLOGY GRADUATES : 2019

Sl. No.	Name	Village	Average	Class
	Mr. Haolalthom	K. Laitui	76%	First (A)
	Mrs. Venny	Chawngchin	75.1%	First (A)
	Rev. T. Doukap	D. Phailien	73.9%	First (A-)
	Upa T. Jampi Gangte	K. Laitui	73.7%	First (A-)
	Mr. Kamzathang Gangte	Chawngchin	73.6%	First (A-)
	Mr. Goukhuolzou	Santing -I	73.5%	First (A-)
	Mrs. Chawinu	Haran	72.5%	First (A-)
	Mr. Mangchungnung	Neihlien	71.8%	First (A-)
	Miss Khawlzanieng	Chawngchin	70.6%	First (A-)
	Mr. Fredy Lienthangvel	Pangen	70.3%	First (A-)
	Mr. Lamkhohao	Tangnuom	69.5%	Second (B +)
	Pastor Th Mawia	New Lambulanre	68.6%	Second (B +)
	Mr. Paubik Gangte	K. Laitui	67.8%	Second (B +)
	Mr. L. Sangkhum Gangte	Muntha	67.5%	Second (B +)
	Upa Mangminthang	Chiengkonpang	66.1%	Second (B +)
	Upa Nengthang	Chawngchin	66.1%	Second (B +)
	Mr. S. Lienminlal Gangte	Belam Veng	65.7%	Second (B +)
	Evan. Paukhosuon	D. Phailien	65%	Second (B +)
	Mr. Khawlneihthang	Chawngchin	64.1%	Second (B)
	Pastor V. Gena	Khanpi	63.1%	Second (B)
	Evan. H. Lamgin	D. Phailien	61%	Second (B)

	Evan. Lientinlal	HQ Belam Veng	60%	Second (B)
	Upa Niala	Shillong	58%	Second (B-)
	Mr. D. Lalpu Gangte	K. Phaicham	57.2%	Second (B-)
	Mr. Thanglalmuon	K. Zoar	57.1%	Second (B-)
	Upa Henkhosoi	D. Phailien	56.9%	Second (B-)
	Upa Paukap	Bijang	56%	Second (B-)
	Upa Khuolkhokam	Khanpi	53.5%	Third (C +)

July Issue a sukkhelh aum zieka zie hih a sukdknna ahi.



Rev Dr Ellien Gangte
Director, BCE, ESC
July 19, 2019

---oo---

ESC COMMON PROJECT FUND SUKLATNA

ESC Common Project dinga Local tin a Budget i na guon dungzui un, kipah umtak mai in H/Q Church in Rs. 100000 leh Bunglon Sapchuom in Rs. 50,000 ahun pie a, vaigei thin le le, zie Chamna Aw ahin ka hun su lang hi. Pathien in akipiek zawhna teu chung ah leh tam tak in vangsak zel tau hen.

ISRAEL TE'N ISU A PAWMLOH NAU

Rev Dr Ellien Gangte

Bangziek a Pathien namtêl Israelte'n kum tamtak angak uh Krista, Messiah chu deihloh a, Romte thah dinga a piekdawk uh ahim? Zie tawbang hih a pa'n achapa dikloh tako ahek a, thah dinga a piek sang a nasa leh huoisie zaw ahi.

Judatén Isu a deihlohnna ziekun tampi sukkhelh a nei ui. Leng David leh Solomon beihnung apat Israel Gam hi Babylon, Medo-Persian, Hellas leh Romte apat thuneikhhumna, sukgimtheihna ana thuok toh pek uh ahi. Lungthim taktak in Messiah hungna dingin ana paucham zing ui. Zie Messiah a nget u chuh Khawvel Vaihawmna Lamkai, Romte do a, galzawhna changa, taksa kivaihawmna zalenna pie a, Israel Gam tungdawk kit ding ahi. Khawvel a, a gimtheihnau apat taksa zalenna ding chauh a ngaihtuoh ziekun Isu thihna apat thagau hukdamna I chan ua, A thawkitna apat thihna zo a, Vangam I chieh dinguh hi ana ngaihtuoh phalo ahiu hi. Israelte dinga Pathien thiltup chu Leisiet a, Inchen khawsak theih, zalen gam neih sanga, gitloh thuneihna apat hukdamna, kumsawt hinna neia, Kumsawt Lenggam a, a um uh ahi.

Isu thilmak bawlte amuu hi. Changthak pek 5 leh nga 2 a mipi 5000 val A vakvah lai in lopi asau a, Isu chu a leng dingun ana siem guou hi. Mahleh Isu utlo in mipi lak apat chun a pawt dawk hi. "Ziephet chun, lenga siem dinga mat hâm guo'n hung ding ahiu hi tih Isu'n A he a; tângah Amah chauh in A chieh chuo'm kit ta a." Johan 6:15. Ziephetchun Israelte chu a lungkie mah mah u a, a kinepna banguh ahih takloh ziekun Isu mudahna'n a hung dim tau hi.

A sawlpa hi na ginchak loh ziekun, A thugen le na lungthim u ah na vawp zing puou hi. Johan 5:38 Zie chitna chuh, zie khawvel vaihawmte hin a na he kha himhim puou hi. A na he kha hi taleu chuh, lopina Lalpa chuh khêndên puon au. 1Korinth 2:8. Taksa lam chauh a khantohna ding a ngaihtuoh ziekun Thagau thil mawng mawng a ngaihtuoh puou a, Krista Isu chu Messiah ahihna diktak mudawk zolo in ana nawlh uh ahi.

---o0o---

PASTOR

**(Zie article hi Lairuotlien in KOHRAN
April 2008 zik kilasawnahi)**

Pastor” I tth hin “PASTOR”... ti a saptheihte chauh hi I kawksak deuh in a kilanga. Bible I et leh Belampu, Pathien Thugentu, Sapchuom nasemtu, puitu leh hotu tihhaw cheng hi a kawk thei vek hi. Zieziekchun, a chunga hihna, dinmun chuom chuom kigen haw cheng hi hetbuoi lohna dingin Pastor Ordination dinmun kipie vek ahi.

Pathien in a belamte puitu ding leh hotu ding chun a belam hawn laka mah a guot a, a kawihchuom sek a, zieziekchun, belamte hatna leh hatlohma chu Pastor Leadership ah a kinga ahi. Zietawbang mah chun Pathien chun a Sapchuom mipite thu a Board, a Synod, a Council a Executive, a Committee ahim a puihsak ngei puoh a, mimal (man) mang in a puihsak zaw sek hi. Zie Pathien lemguotna zuia, phachuomngai taka zuite chu Kanaan gam a lut ui. Zieziekchun, Pastor khut a achun vangseitna leh vangsakna chabi thu piek ahi tih hi ginlah ding ahi puoi. Pathien in a sapte a hiu a “Kuomah bawlsiet a phal puoh a, ahi, lengte le a hitho a, ka sathau nuh chu sukha kiu in la, ka thiengaute pawi him him le khawih kiu,” tiin Pathien in ei hilh ahi. (Sam 105:15) ahi, zie thu haw pawi salo a, Pastor/belampu pawi khawihte chung achun thuoknate, haksatnate leh thihna tieng hiel le a tun sek dan mit leh bil ngei in I muu in a heu hi. Pastor/belampu pawikhawih zieka nam or gam, khawsung leh mimal in sietna a tuokteu haw hi na ngaihtuoh sek em?

Bible a “sukha, khawih” thumal Pathien in a matna haw ngaih tuoh kham ahi. Zie thumal hi mun 15 ah a kilanga. Pathien in a khawih or sukkhak him him chu danglamna a sielam ahim aphalam ahim ah a nei tei sek hi. Naupang neucha ka hih lai khan pa khatin ai-asana, aisanna ding chun mawlh a thiek bawng a, a chil a sietkhum a, “A sukha taphawt thiding ahi” a hun tih zet chuh sukkhak ngam ahi teuh puoi. Mihiem in sukkhakloh ding a tih bawn I lauh chun “Pathien in sukha kih (Do not touch) a

tihte chu Danger sign: luhawm nuoia mawlhkang kikawihkallh tawbanga lauh um ahi.

Pastor/belampu hi a Sapchuom thiengthoten masang apat a thil thawnpiek lul tak I dawn u chu ahi. Pathien inle a ngathlul mah mah ahi. Thuphuon 1:20 a.. Pathien khut changlama Aksi sagih a tih khu le Pastor a tihna hidingin ka gingchai. Pathien khut changlam ahin thuneihna, hamphatna leh lulna a etsak hi. Eihaw I hih u leh khat leh nih bek I dem masakphawt loh leh I annek limlo. Demtu leh sawiseltu ading chun vitamin hawihtak himahleh a thuoktu leh a dawngtu ading chun Casualty a lut theihna hiel ahi. Kipahchak leh kifuihuohna hin mi a siempha zaw sek hi. Pastor chu mihiem ahitho u a. Chau leh ngui, zawngkhal taka a um hun um ding ahi. Kipahchak leh tilkhouh leh amau pauchampih chu I sepding ahi a, amau chuh hehpih a ngaisang dingin Pathien in ei deih hi. (I Thes. 5:12) Mi tamtak chun Pastorte hi amihihnau hi I mu khumkhel thei sek puoh a. Pastor a vak hih ziek u a mihiemna um talo dinga vak ngaihtuohna hi a diklo ahi. Zie tawbang hinkhuo (Pastor) hi Elija leh Paul hinkhuo ale ziltheih ahi. Haksat-mangbat, natlesat leh buoina I tuok chang inle mitthi puma Pathien kawma ei na paucham sak sek chu Pastorte hi ahi sek ui. Zie tawbang mahchun, Pastor zite chun a pasalteu nasepna ah munchengah zui zo kileu le a umna mun u ah a paucham sak sek ui. Kilanglo a taksa leh thagau a hatna pietu chu a ziteu hi ahi. Abikin, lawhnei a nasemtute, Pastorte hi nupana Sapchuom sunga nasem thei ding khawp in vak ki-enkawl thei leh chu I Kristien hinkhuou hi khuti lawm lawm in niem dingin ka gingcha puoi. Zie ding chun Sapchuom mipite hin I mawhpuoknau nau hi I ngaihthah mah mah un a kilang a. Zieziek chun ahi Sapchuom dang sanga Korinth Sapchuom aniemna chu (II Kor 11:8).

“Pastor cha hingal in a gilo na e” I ti sek ui. Ei haw hin I sukhawlo zo uh ahi, ka lungthim in a ngaihtuoh a. A dik ka sa a, mihiem cha ahihtho ziekun Pastor a vak hih zieka chu I puu Adam suon hilo a ngaihmai theih hilo ahi. Insung haksatna, bawlhsawmna leh pan pih a mamawhnau a, sumlepai, thalezung a panpih hi malsawmna ana hi. Sapchuom puitu sanga politiciante I Ngathsan zawkna (ideology) hi mipite kisiemphatna ding pawimawh tak khat chu ahi. I lungthim a I chih zing ding chu:

l. Hehpih ding ahi. I Pet4:7-9

2. I chawm ding uh ahi. I Tim 5:5-17
3. I humbit ding uh ahi. I Tim5:19
4. A thuu I zawp ding uh ahi. Heb 13.17
5. I Pauchamsak ding uh ahi. Heb. 13:18
6. I hetzing ding uh ahi. Heb. 13:7
7. I zahding uh ahi. Heb 13:24.

---o0o---

PATHIEN LUNGSIETNA MUH/ CHAN BAIHLAMNA PEN

Evang. Lamzugin

Thugentu khat in, Pathien lungsietna channa ding ahin lampi za hiel aum in, ahin, khat chauh achien hi, tin ana gen hi.

Zie chu bang ahi? tin, a lawite khat in adawng a, thugenpa chun, ‘Helo him dinga ka hun ginchak na hi. Pathien lungsietna neihna dinga umsun leh baihlampen chu, A thupiek te zawp hi ahi. Isun kuole ka thupiek haw pawm a zawp ta chuh ei hehpih ahi. “Kuole, ka thupiek haw pawm a, zawp ta chuh, ei hehpih ahii. Kuole, ei hehpih chuh Pa’ñ, amah le hehpih ina; ken le amah chuh hehpih ing ka ting, a kawmah kilak ing ka,” a ti a. (Joh 14:21)

Chun, Isu’n akawm ah, “hinna a lut na nawp leh thupiek haw chu zawp in.” (Matthew 19:17). Zing cheng leh pahchakna la san, Bible sim inla paucham zing in, chun Pathien in bang ahun hilh nuom em tin ngaitha zing in. Zie zawh chuleh a thupiek te zawp kim ding dan ngaihtuoh in, Zie chu phatak a Isu guola hin ding, haksatna tawp khawk; thihsna tieng tung ding hi zieng lele, bawl tun tun ding.

Waterloo gal ahin, Napoleon chu British General Wellington in ana zo hi. Napoleon luong pang ahin, Generalpan, leng Hill kawm ah, ka lalpa nang ana thi hita leh chin banga na na thupiek ding? tin ana dawng hi. Chawmchan a dawng a, “Kei bawl/um guol tak a na um ding ahi.” tin ana gen hi.

Isu chu Pa lopina dingin a thi a, a nungzui te cheng hi tawh a thi dinga thupiek I hiu hi. “Naisai lo e! ei uh gilo a thisa, gilo in bangti’n a I hin naklai dinguh?” (Rom 6:2). Chun apawimawh

leh hinna na san piek ding, zie chu dan thu zawpna ahi. Sakhuo chu thih ngam tienga na zuih tieng Sakhuo diktak chauh hiding ahi. thuok ngamlo, chan ngamlo ana zuih sakhuo ahin kigel thak in. Taksa malsawmna chauh deih a kristien na hih chun nanga dinga vangsietna leh manthai zawkna hung hi ding ahi. Isu chu kum 33 ahih in, kross a thidingin a kisa zo tai. Ei ule amah guol a Pathien adinga kipie a, I mihiempih teu lungsiet hi I nasep ding uh ahi. Kuole a thupiek zawp ta chu a lungsiettu ahi ngal a.

Zie ahin hehpihna chuh bang a hih I heu hi; Krista chun ei uh dinga a hinna a piek tâk ziekin: ei un le suohiphte dingin I hinnau I piek thuk dinguh ahi. (1John 3:16)

Lalpan a thu simtu te cheng vangsaak ta hen.

---00---

SUM LEH MIHING KHAWIZAW ALUL ZAW?

By: Thahpau, Gangte Veng

Bible in dangka sum ngaihlul loh ding gen mahleh, khawvela mihingte hih sum pawimawh lo leh manglo a pha kuomah I um puou hi. Mahleh sum ngaihlul takluot zieka, Pathien na a sep ding banga sem manlo leh, cha leh nau enkawl manlo khawpa sum hawlnaa hun cheng mat zawh zieng chu Pathien deihsan ahi puoi. I Tim.6:10.

Dangka sum ngaihnat hi gitloh tin cheng bul ahi ti'n a gen a, chuleh Matt. 6:26 Kuoma'n to nih na a sem kawp thei puou hi, khat limbawl in, khat simmawh ding ahi ngal a, Pathien leh sum na na sem kawp thei puou hi. Zieziekchun, sum ngaihlul takluot hin thutak lohna atun a, Pathien tawh kigamlat ahinhna leh, gitloh tin cheng bul ahinhna, sum ngainate dinmun leh a hihna point thum in hun sulang ingka.

(1) Khawvel hukdampa, Lal Isu hung pienna mun ding Thiemgaute'n ana genlawk sau, Bethlehem a khuolbuk Room lailung pen reserved a um zing lai chuh, khuolbuk ngakpa (Tahre) kiti pa hin Pathien thil guot thiemgaute thu sanga dangka sum a ngaihlul zawk ziekin, mi haus a khat in sum tamtak in ava chaw

dawk a, ama'n a luoh ta a, Mari leh Joseph chu Khuolbuk achun mun a chang zo ta puou hi. Luke 2:7.

(2) Sinsakte laka Juda Iskariot hile sum ngaina mi ahih ziekin Thiempu liente'n Isu man dingin dangka sawmthum a pieu a, mawhna neilo Lal Isu chu migilote khut ah a matsak tai. Matt. 26:15. Sum ngaihlul/ngaihnat gitloh tin cheng bul ahihna leh gitloh man thihna hi tih hi Juda Iskariot a dingin adik diek hi maw? A gitloh zieka a sum muh chun mun khat a chaw a, a kikhailum a, abungbu'n a kie a, a gil cheng a pawt vek ta a. Nst. 1:18.

(3) Isu than veng, Rome sepaihte'n le dangka sum a ngaihnat ziek un, Thiempu liente leh Danthuzikte'n than veng sepaihte chu lepcieh gen man dingin, sum tamtak a pieu a, Isu chuh thana pat in a tho kit puoi, ti a gen dingin thu a pie tau a. Thupiek dungzui in, sepaihte'n le Isu a thokit puoi, ka ihmut kal un, a sinsakte'n ahung gukdawk uh ahi, ti'n a gen ui. Tuni chan hinle Sadukaite leh mi khenkhatte lak ah Isu a thokit puoi, ti'n a gen ua, thawhkitna ginchalo pawl a um lawh tau hi. Matt. 28:15.

Awle, zie point thumte apat hin sum ngaihlul chu gitloh tin cheng bul ahihna leh gitloh man chuh thihna ahi tih thu hi a kichien ta a, tuhin I thupiu in a tup pen leh a gennawp chu, sum leh mihing khawizaw alul zaw? tih dawtna hih simtute cheng in bangti'n na dawng ding um? Chawmkhat ngaihtuoh phawt unla, na dawnna chu mihing alul zawi tih ahi maithei a, khuti ahihleh bang a ti a, na chateu umdan ding leh a hinkhuo ding uh ngaihtuoh manlo khawp a, sum leh pai, In leh lo hauhsakna ding mai ngaihtuoh a, na hun cheng uh na mat bei mai sek uh? Na chateu gitlohna leh manthaina lam zuon a a chieh zing lai uh a, amau haw ngaihtuoh sanga nek leh dawn, sum leh pai hauhsakna ding mai na ngaihtuoh theih uh? Aw, u leh nau leh nu leh pate haw, tuhi hun nunung ahih tak ziekin khanlawh ahun ta ie! Lalpa apat I gochan uh a kawma I puihkit ding uh um sun chuh I chateu chiet hi ahi mai a, thildanga vansakna I dawnteu hi chu huntawp a I thih tieng uleh I nutsieh ding uh ahi mai a, ahinla I chateu chiet hi chu Pathien kawm ah I pui ding um, I pui puoh ding um, I mawhpuokna lieu lieu uh ahi. Khawvel ahin sangawn in I hung pieng uh a, sangawn mah a pawtsan ding I hiu, zie tieng chuleh Lalpa kawm ah banga I gen ding uh? Tu leh tu hinle I chateu khawilam zuona chieh ahiu em, kingaihtuoh phai tiu.

Lalpa kawm ah nang ngawn in na chieh dem, na inkuon un?

Mihing lul zaw a na ngaih leh na cha leh naute Lalpa thununna leh hilhna ah seilet sak inla, hukdamna lampi kawkmuh inla, Lal Isu Kross bul ah pui tung ah, zie chu na mawhpuokna ahi. Sum leh pai, In leh lo, hauhsakna hawlna'n mang leh chun In leh lo, pucca building hun nei in na tin, hung haus'a'n na tin, mahleh vangam ah go nei puo'n na tin, Lalpa kawm ah nang ngawn in na chieh em, nang nasan le na chieh puoh dem, ka he puoi; kingaituoh tie? "Bawipu, ka kawm a tello in bangti'n ka pa kawm ah ka chieh to thei die? Gen.44:33.

---00---

EVANGELICAL SYNOD CHURCH
BOARD OF CHRISTIAN EDUCATION
Secretariat, Chiengkonpang – 795158
July 22, 2019

NSSU JUNE MISSION, 2019

Vacation Bible School: Synod Hq. Church, ESC, Chiengkonpang ah June 12 - 15, 2019 sung, Thupi: Thutak chun hun zalen sak ina' Johan 8:32 manga neih ahi. Pathien Thu leh La a kipawlkhawmna aum a, a nuom hi. Synod Hq. Church NSSU Sinsaktute'n kum dang banglo in, Pathien Thu, Bible thutak, hukdamna thu leh Kristien hinkhuo kisinsakna dingin a hun guonggalh uh ahi. Pathien hukdamna, gitloh ngaihdamna, kumsawt tatna hechien a, pienthakna neile hun tieng aum uh ahi. Pathien thutak zala gitloh ngaihdamna chang a, zalenna neite zalin Lalpa chu I pakchau hi. Chanchinpha Pathien thu zieka a hinkhuo sukdanglam aumte Lalpa deihbang a hinkhuo a mattoh theihna dingun pauchampih zing hitiu.

NSSU Gospel Camp: ESC Ho-In, Bijang, Churachandpur ah June 20 - 23, 2019, 'Na hinna dingin taidawk ah' Thilsiembul 19:17 sung thupi a manga neih ahi. NSSU Sinsaktute'n Naupangte hukdamna ding ngaina takin pa'n alau a, nulepa tuonvaite le kiphal takin a pang u a, Sapchuom nulepate'n pauchampihna ei neih sak u a, kipak aum takzet ahi. Naupangte'n Pathien Thu lunglut takin angai thou a, Bible Pathien thutak ahihna a hechien u a, nuom asau hi. Pathien in a gitlohnau cheng cheng a ngaihdamna, kumsawt tatna hechien a, pienthakna nei a, kipak

mah mah tampi aum bawk ui. Gitloh ngaihdamna hechien a, tui baptisma chang le mi 14 aum ua, Lalpa chu I pakchau hi. Lalpa deihbang a Kristien hinkhuo mang a, Isu nung zuihna aneih ua, kipak taka a hin theihna dingun ngetpih zing hitiu!

NSSU Teachers' Training -cum- Naupang Crusade: ESC Ho-In, Gangte Veng ah June 27 - 30, 2019 sung 'Na Pathien tuok dingin kisa zoin' Amos 4:12 thupi a mang a, neih ahi. NSSU Teachers' Training hih Ni khat guntak a mat ahi. Pathien umpihna zal in nuom asau a, a phat chuompiah uhle ginchak aum bawk hi. Naupang Crusade hi Pathien umpihna lopi tak ka chang ui. Khawvel gitlohna apun tak zieka, Pathien lungnatna hung tung dingte lauh aum dante gen thupi diek ahi. Bible a Adam leh Evi apat Kumsang Lenggam chana, thu-awihloh zieka Pathien a tuoknau, gawtna chi chuom chuom gen ahi. Pathien tuok dinga kisak zawh amawhna he chien a, Isu hukdamna, Pathien apat gitloh ngaihdamna, kumsawt tatna hechien a, pienthakna hun tieng aum ui. Tui Baptisma mi 11 a chang u a, I kipak tak zet uh ahi. Lalpa deih banga Kristien hinkhuo manga, a khantoh theihna dingun pauchampih zing hitiu.

Krista A, na seppih uh,

Rev Dr Ellien Gangte

Rev Dr Ellien Gangte
Director, BCE,ESC

---oo---

PAUCHAMNA A HET DING

Kum 2020 January, 14-18 sung Khanglai Conference,
Khanpi khuo a mang dinga kisakna ahin, Pathien
mapuihna a lawhting taka mat ahilh theihna dingin
pauchamna ah he chiet hitiu.

Lal gam a naseppih uh,

Mr. Paubik,
Secretary, CKKP

PIENGTHAK LO IN

- Rev. Khaitinthang.

1. **Piengthak lo in hinkhuo hi lawhting tak a mat theih ahi.**
2. **Piengthak lo in sakhuo mitak a um theih ahi.**
3. **Piengthak lo in kituptak leh feltaka vaihawm theih ahi.**
4. **Piengthak lo in hinkhuo kilawmtak a mattheih ahi.**
5. **Piengthak lo in dinmun sangtak luoh theih ahi.**
6. **Piengthak lo in degree sangtak neih theih ahi.**
7. **Piengthak lo in Pathien thu thiemptak a gen theih ahi.**
8. **Piengthak lo in mite pahchak lawh theih ahi.**
9. **Piengthak lo in sum leh pai tampi neih theih ahi.**
10. **Piengthak lo in mite lungsietna neih theih ahi.**
11. **Piengthak lo in crusade bawl theih ahi.**
12. **Piengthak lo in councellor apan theih ahi.**
13. **Piengthak lo in Upa kaih theih ahi.**
14. **Piengthak lo in Pastor kaih theih ahi.**
15. **Piengthak lo in mission na sep theih ahi.**
16. **Piengthak lo in thil cheng a sep theih abawl theih a atawpna vang chuh Pathien lungnatna leh hansie dawl na mai hi ding ahi.**



D. Munlui Sapchuom laklutna



D. Munlui Sapchuom laklutna

CHAMNA AW PATRON MEMBER LIST

CHIEF PATRONS:

1. Pu S. Paukholal	Chief of Bunglon	1994
2. Ebenezer Chapel	D. Phailien	2014
3. ESC Shillong	Shillong	2014
4. Mr. S.K. Juiliana	Lamphel	2014
5. Nk Sawmte K. Gangte	Fujairah, UAE	2015
6. Nk Esther Tinglamkim	Gangte Veng	2015
7. Pu Thangzago (K.Vawmcha)	Chiengkawnpang	2015
8. Langol ESC	Langol	2016
9. Mrs Hoisi W/o Laldawng K.Gangte	Jiribam	2016
10. Upa Letkam	Bunglon	2016
11. Pu (L) Kamgo K.Gangte	Phuolsanbung	2016
12. Shillong Local Missionary Board	Shillong	2016
13. Pu Lunkholal Gangte	New Delhi	2017
14. Pu Noksiek	New Lambulane	2018
15. Nemkholam	New Lambulane	2018
16. ESC Gangte Veng M&B	Gangte Veng	2018
17. Nk. Nancy Nemneihvak	Hill Town	2019

PATRON MEMBERS:

1. Pu Henkhojam	Siempat	1994
2. Sep. L. Gangte	5th Assam Regt.	2003
3. Dr. Lalazadral	Chiengkawnpang	2004
4. Upa Niala	Shillong	2004
5. Pu P. Gangte	Shillong	2004
6. Pu B. Manga	Shillong	2004
7. Pu S.T. Gangte	Shillong	2004
8. Pu Lalkithang	Delhi	2004
9. Rev. Dr. Soson	Dimapur	2007
10. Rev. T. Kampu	Guwahati	2008
11. Pi Phalneithiem	Dehradun	2008
12. Pu B.K. Gangte	Dehradun	2008
13. (L) Hengo	Chief of Chongmun	2010
14. Upa Dr. L.S. Gangte	Chiengkawnpang	2011
15. Pi Niengzalam	Chiengkawnpang	2011
16. Pu Sangvung	Chiengkwanpang	2011
17. Pu S.K. Gangte	Shillong	2011
18. Pu Lovejoy	Kohima	2013
19. Pu Goginthalang	Shillong	2013
20. Pu L. Minlun Gangte	Shillong	2013
21. Pi Lalkim	Shillong	2013
22. Hav. H.L. Gangte	Shillong	2013
23. Ms. Grace Lalbiek	Guwahati	2013
24. Pu L. Neihsiel	Shillong	2013
25. Pu Lamtinliem	Shillong	2013
26. Pu S. Thienlaljoy.	SDO H.O. Veng	2013
27. Pu L. Savia	Gangte Veng	2013
28. (L) Lt. Col. L. Gangte	Chiengkawnpang	2013
29. (L) Upa K. Manga Gangte	Shillong	2013
30. Rev. Dr. Th. Lamboi Vaiphei	Hill Town	2015
31. Pu K. Pauboi Gangte	Chiengkawnpang	2015
32. Siemlaljoy	Lamphel	2016

DIAMOND MEMBER:

1. Upa Lamkhodem	Chiengkawnpang	2015
2. Mrs Felli	Chiengkawnpang	2015
3. Moizokim (Chloe)	Lamphel	2015
4. Pu Lama B. Gangte	Langol	2016

GOLD MEMBER:

1. Pi Niengneithchoi	New Delhi	2014
2. Agape Children Eng. Jr.H/S.	Ithing, Thanga	2016
3. Upa Th. Mangngul	Bunglon	2016
4. Pi Chawimawi	Lamphel	2017
5. Pastor Gouliemang & Family	Tripura	2018
6. Muntha ESC	Muntha	2018

SILVER MEMBER:

1. Pi Sailothingi Thangzom	Old Lambulane, Imphal	2014
2. Antioch High School Abicharan	Tripura	2014
3. Upa Thanglal	Bijang	2015
4. Upa Laltinthang	Gangpimul	2015
5. Lamneihhat	D. Phailien	2018
6. Pu Sonpee S. Thangzom	Lamphel, Imphal	2018
7. Pu P.L. Manga	Lailak, Mizoram	2018



Bijang NSSU Gospel Camp



Gangte Veng NSSU Crusade

PIN

--	--	--	--	--	--

Chamna Aw

(Evangelical Monthly)

Regd. No. 64436/96

E-mail:e7s7c7@gmail.com

www.synodchurch.com

Alak man apat ₹

If undelivered pliz return to:

ESC SECRETARIAT,
Chiangkawnpang, Churachandpur,
Manipur - 795158

*Published by Rev. T. Kongon on behalf of the Evangelical Synod Church
Printed at: THAWNSAUA PRINTING WORKS, CENTRAL LAMKA*